



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Sumáriu Atividade Mensál
Observasaun ba Parlamentu Nasionál

Fevereiru 2021

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275
Telefone: 3323883 | 77257466
www.jsmp.tl
info@jsmp.tl
Facebook: www.facebook.com/timorleste.jsmp
Twitter: @JSMPtl

Tabela Konteúdu

Introdusaun	3
A. Reuniaun Plenária	4
1) 02 Fevereiru 2021	4
2) 03 Fevereiru 2021	7
3) 09 Fevereiru 2021	8
4) 15 Fevereiru 2021	9
5) 16 Fevereiru 2021	10
6) 22 Fevereiru 2021	10
7) 23 Fevereiru 2021	12
B. Reuniaun Komisaun A	12
1) Reuniaun 3 to'o 6 Fevereiru 2021	12
2) Reuniaun 10 to'o 12 Fevereiru 2021	13
3) Reuniaun 24 Fevereiru 2021	13
Konkluzau no rekomendasaun	15

Introdusaun

Iha Feveireu 2021, JSMP kontinua halo monitorizasaun ba reuniaun plenária no reuniaun Komisaun A Parlamentu Nasionál, inklui diskusaun ba proposta no projetu lei sira ne'ebé Komisaun A hala'o iha Munisípiu Aileu.

Parlamentu Nasional iha fulan Feveireu realiza reuniaun plenária hamutuk dala 8 hodi hala'o diskusaun no votasaun ba proposta no projetu lei sira, proposta rezolusaun sira hamutuk 7 no baixa mós proposta no projetu lei sira ba komisaun espesializada permanenti sira atu halo apresiasaun ba esbosu lei sira hamutuk 3 iha agenda *orden do dia* nian.

Iha agenda antes *orden do dia* deputadu sira halo apresiasaun ba relatóriu fiskalizaun husi komisaun espesializada permanenti sira hamutuk relatóriu 7 no lé pedidu sira justifikasaun falta husi deputadu sira inklui deklarasaun política husi Bankada Parlamentares sira no votu pesár ba eis-titulár sira ne'ebé mate ona.

Alende ne'e, Parlamentu Nasionál iha agenda *orden do dia* halo mós debate ba Konta Jerál Estadu 2019 no invoka rejimentu Artigu 143 hodi bolu Governu mai partisipa iha reuniaun plenária atu hatan ba preokupsaun sira ligadu asuntu sira ne'ebé deputadu sira kestiona no mós apresentasaun husi Governu b relatóriu sira kona-ba Ezekusaun Estadu Emerjénsia iha períodu Agostu-Dezemburu 2020 no períodu Dezemburu –Janeiru 2021.

Atividade Komisaun A nian iha fulan Feveireu 2021 konsege realiza reuniaun hamutuk dala 10 hodi aprova iha diskusaun no votasaun sira ba proposta lei 1 no apresiasaun ba ata relatóriu reuniaun komisaun 2 no audénsia públiku ho entidade relevante sira hamutuk 2 no mós komisaun hetan tulun husi asesór sira halo apresentasaun kona-ba anteprojetu Lei judisiáriu.

Esbosu Lei sira ne'ebé komisaun finaliza ona nia diskusaun iha espesialidade mak Proposta Lei Nú.11/V(2ª)- aprova Regime Jurídiku Arbitrajen Voluntária e prosede primeira alterasaun ba Kódigu Prosesu Sivíl no aprovasaun kalendáriu diskusaun ba projetu no proposta lei 6 mak hanesan Esbosu Lei Organizasaun Judisiáriu, Proposta kona-ba Lei Programasaun Formasaun Setór Justisa, Proposta Lei kona-ba Estatutu Majistradu Judisiál, Proposta Lei kona-ba Estatutu Ministériu Públiku, Proposta Lei kona-ba Estatutu Defensoria Públika, Proposta Lei kona-ba Primeira Alterasaun ba Kódigu Prosesu Penál.

Komisaun A mós halo audénsia ho entidade relevante sira hanesan Ministériu Justisa (MJ), Tribunál Rekursu (TR), Prokuradória-Jerál Repúblika (PGR), Defensoria Pública (DP) no sosiedade sivíl, partikularmente JSMP ho objetivu husi atu rona hanoin kona ba

PPL Nú. 25/V(3ª) -Rejime Jurídiku Asosiasaun Públika Profisionál no Proposta Lei Nú 26/V/3ª – kria Orden Advogadu Timor-Leste (OATL).

Tuir obervasaun JSMP nian iha fulan Feveireiru nota katak atividade reuniaun komisaun la'ó di'ak no efetivu tebes liuliu iha serbisu lejislasaun nian hodi diskute no aprova iha especialidade ba Lei Aprova Rejime Jurídiku ba Arbitrajen Voluntária no Prosede Primeira Alterasaun ba Kodígu Prosesu Sivil.

JSMP nota katak maski iha hela Estadu Emerjénsia no impase polítika ne'ebé to'ó agora sei kontinua hela, maibé iha Komisaun A, deputadu sira tantu husi bankada opozisaun no bankada Governu iha kolaborasaun di'ak hodi tau prioridade ba asuntu serbisu ne'ebé mak tau ona iha planu Komisaun nian. Deputadu sira balun dalaruma la partisipa máximu iha reuniaun Komisaun nian tanba ba partisipa fali iha Komisaun seluk, maski nune'e sira nafatin fó justifikasaun.

A. Reuniaun Plenária

Parlamentu Nasionál iha fulan Feveireiru konsege realiza reuniaun plenária hamutuk dala 8 ho ajenda diskute no votasaun ba proposta no projetu lei sira no proposta rezolusaun sira hamutuk 7 no baixa mós proposta no projetu lei sira ba Komisaun Especializada Permanente sira atu halo nia apresiasaun ba esbosu lei sira hamutuk 3 iha ajenda orden do dia nian.

Alende ne'e, halo apresiasaun ba relatóriu vizita fiskalizaun husi komisaun especializada permanenti sira hamutuk 7 inklui mós hato'ó informasaun diversus sira husi deputadu relasiona ho rezultadu fiskalizaun no informasaun sira ne'ebé komidade sira solisita ba deputadu sira hodi hato'ó iha reuniaun plenária no mós halo deklarasaun polítika husi bankada Parlamentár CNRT no KHUNTO no halo leitura ba justifikasaun falta husi deputadu sira.

Ajenda reuniaun sira ne'e mak hanesan tuir mai ne'e:

1) 01 Feveireiru 2021

Parlamentu Nasionál iha 01 Feveireiru 2021, liuhusi reuniaun plenária iha ajenda antes *orden do dia* deputadu sira halo apresiasaun ba relatóriu fiskalizaun husi Komisaun G ne'e kaer ba asuntu Edukasaun, Juventude, Cultura no Sidadania iha munisípiu Dili, Baukau, Covalima, Manufahi no Bobonaro.

Alende ne'e, bankada parlamentár Partidu KHUNTO halo mós nia deklarasaun polítika hasoru akuzasaun sira ne'ebé bankada opozisaun CNRT halo relasiona ho kazu abuzu podér husi membru Governu KHUNTO nian iha rezidénsia konseleiru másimu partidu KHUNTO nian hodi kaptura no ameasa uma na'in Sr. Arnaldor Mendes. Relasiona ho kazu ne'e, KHUNTO deklara katak akuzasaun ne'e falsu no la iha baze fundamentu

tanba akontesimentu ne'e "kebetulan" iha vizita husi Viseministru Interiór no nia prezensa la'ós atu ameasa señor ne'e maibé partisipa iha reuniaun sira KHUNTO nian.

Iha agenda *orden do dia*, deputadu sira hala'o diskusaun no votasaun iha jeneralidade ba Proposta Lei nú. 10/V(2ª) kona-ba Autorizasaun legislativa ba Governu hodi prosede alterasaun ba Kodígu Prosesu Sivil.

Rezultadu aprovasaun proposta Lei ne'e iha jeneralidade aprova ho votu afavór 49, kontra 0 no absteinsaun 9.

Enkuantu, hafoin aprovasaun iha jeneralidade plenária Parlamentu Nasionál liuhusi meza submete kedas proposta refere ba iha votasaun finál global ho nia rezultadu votu mak aprovalu ho votu afavór 41, kontra 0 no absteinsaun 13.

Alterasaun ne'e hetan promulgasaun husi presidente repúblika iha 24 Feveireiru 2021 no públika ona iha jornal repúblika iha 02 Marsu 2021, informasaun kompletu bele asesu iha website jornal repúblika¹.

2) 02 Feveireiru 2021

Iha 02 Feveireiru 2021, Parlamentu Nasionál halo reuniaun plenária ho agenda *período antes ordem do dia* nian mak Komisaun E ne'ebé trata asuntu infraestruturá apresenta relatóriu fiskalizaun ba Munisípiu Ermera, Ainaro no Likisá.

Iha relatóriu ne'e Komisaun E apresenta deskobrimentu sira iha Munisípiu sira. Iha Ainaro, iha jeradór 4 ne'ebé mak desmontadu hela tanba hetan ona substituisaun husi sistema transmisaun enérxia sentráleletrika, maibé balun sei halerik hela tanba la asesu ba eletrisidade. Konsumidór sira iha Postu Administrativu Hatu-Builico hamutuk 1063 mak seidauk monta sistema prepagu. Nune'e Komisaun E rekomenda ba MOP liuhusi Autoridade Nasionál Eletrisidade (ANE) empreza públika atu fó solusaun ba jeradór ne'ebé la funsiona iha Munisípiu Ainaro.

Relasiona ho problema sira ne'e, Parlamentu Nasionál sujere ba ANE atu garante liután kualidade fornimentu enérxia elétrika no mós tarifáriu nu'udar kontribuisaun atu hasa'e reseita ba Estadu. Husu mós ba Governu atu estabelese sistema informasaun públiku kona-ba uza kontadór prepagu presiza aplika sansaun ba aktu konesaun ilegál sira.

Iha intervensaun, deputadu sira husu ba Governu atu assegura nafatin fiskalizaun kona-ba operasaun no manutensaun ba rede distribuissuun no fornimentu enérxia elétrika ba kada sub estasaun.

¹ Bele asesu iha website jornal da repúblika: http://www.mj.gov.tl/jornal/public/docs/2021/serie_1/SERIE_I_NO_10.pdf

Deputadu sira mós husu ba ANE atu mellora liután kondisaun sira husi ekipamentu operasionál tékniku EDTL tuir rekezitus ezijidu.

Alende ne'e deputadu sira mós apresenta preokupasaun sira seluk hanesan bee moos no estrada sira iha área rurál, husu atu Governu bele respode ba preokupasaun hirak ne'e.

Rekomendasaun sira iha relatóriu fiskalizaun munisípiu:

1. Husu Governu atu kontinua aseguara koordenasaun no implementasaun projetu PNDS sira ba dezenvolvimentu iha suku inklui aseguara kontinuidade ezekusaun projetu inisiadu sira ne'ebé mak finansia ona husi Estadu;
2. Reavalia no verifika rekezitu valor subsídiu sira ne'ebé atu atribui ba estrutura suku sira ho baze klasifikasaun lokalidade;
3. Nesesáriu atu kontinua nafatin envolve autoridade suku ho comunidade iha prosesu dezenvolvimentu infraestrutura básika sira liu husi PNDS;
4. Autoridade Nacional para Água e Sanemaneto-Instituto Público (ANAS-IP), husu atu aseguara nafatin ezistênsia no disponibilidade distribuisaun be'e-mos, kriaun grupu jestaun sira ne'ebé la prejudika direitu intervensaun estadu fora husi área urbana sira;
5. Rekomenda ba ANAS-IP atu melhora ezersísiu kona ba promove aplikasaun polítika tarifária ba serbisu prestadu abastesimentu sira kona ba bee-moos hanesan kustu finansiamentu no manutensaun;
6. Nesesáriu ba Ministériu Obras Públika ho ministériu relevante sira atu elabora informasaun detalhadu kona-ba projetu implementadu hotu iha munisípiu Ermera inklui kria mapeamentu kona ba projetu sira iha Munisípiu Ermera;
7. Melhora koordenasaun ho komunikasaun entre ADN ho kompañia sira iha âmbito mplementasaun projetu, nune'e mos kontinua aseguara qualidade akompanhamentu tékniku ho profesional iha prosesu implementasaun projetu sira;

Rekomendasaun sira iha relatóriu fiskalizaun ba Munisípiu Likisá:

- Projetu emerjénsia iha Munisípiu Likika responde duni ba preokupasaun comunidade sira nian.
- Implementasaun projetu impréstimu laiha koñesimentu autoridade Munisípiu, Obras Publika ho ADN.
- Komsumidór EDTL maioria mak sei uja sistema kontadór Konvensionál tanba kontador prepago eradu ona.
- Tenke iha jestaun di'ak ba Bee-moos tanba comunidade barak sei falta asesu ba Bee-moos
- no persiza fornese enérjia eletrisidade ba comunidade aldeia 31 mak seidak asesu ba eletrisidade.

Iha ajenda *período ordem do dia*, PN halo diskusaun no votasaun hodi aprova Proposta Rezolusaun nú 3/V(2ª) – kona-ba Adezaun Timor-Leste ba Konvensaun Nova lorque sobre Rekoñesimentu ba Ezekusuan sira husi Sentensa Arbitrais Estranjéiru ho votu afavór 31, kontra 0 no abstensaun 3².

Alende ne'e, Meza mós anúnsiu admisaun hodi baixa ba Komisaun Finansas Públika Proposta Lei n.º 27/V(3ª) – Enkuadramentu Orsamentu Jerál Estadu no Jestaun Finanseira Públika.

3) 08 Fevereiru 2021

Iha 08 Feveriru 2021, Parlamentu Nasionál halo reuniaun plenária ho nia ajenda mak halo apresiasaun ba relatóriu fiskalizaun Komisaun G ne'ebé trata kona-ba asuntu edukasaun, juventude, kultura no sidadania iha Munisípiu Dili, Baukau, Covalima, Manufahi no Bobonaro.

Objetivu husi vizita fiskalizaun ida-ne'e atu observa direktamente kona-ba implementasaun orsamentu ba Covid-19 no implemetasaun kritériu ne'ebé estabelese ona husi Ministériu Saúde molok reativa prosesu aprendizajen.

Iha vizita fiskalizaun ida-ne'e Komisaun G hasai konkluzan katak tuir lista ne'ebé apresenta husi Serbisu Saúde Munisípiu Dili, foin eskola 16 mak prenxe ona rekezitu ba prosesu aprendizajen. Ministériu edukasaun seidak iha preparasaun ne'ebé di'ak ba planu hodi reativa prosesu aprendizajen, tanba iha eskola barak seidak iha facilidade tuir padraun ne'ebé Ministériu Saúde rekomenda. Komisaun G mós observa katak sei iha comunidade balun ne'ebé sei okupa hela koridór eskola nian. Nune'e Komisaun G hato'o rekomendasaun ba Ministériu Edukasaun:

- ✚ atu orienta prosesu aprendizajen ba eskola públiku ne'ebé mak prenxe ona kritériu husi Serbisu Saúde Munisípiu Dili.
- ✚ kria kondisoens ba eskola hotuhotu iha Munisípiu sira no fasilita eskola sira ne'ebé seidak prenxe rekezitu.
- ✚ rezolve comunidade sira ne'ebé to'o agora sei okupa hela koridór eskola liuliu eskola públiku iha Munisípiu Dili no mós Munisípiu sira seluk.

Iha intervensaun, deputadu sira levanta preukupasaun sira kona-ba infraestrutura, beemoos, problema kona-ba profesór kontratadu sira no programa sesta bázika. Deputadu sira husu atu Ministériu Edukasaun rezolve lai problema husi profesór kontratadu sira ne'ebé to'o agora seidak rezolve antes atu rekruta tan profesor foun. Kestaun sesta

² Atu hatene kompleitu bele asesu rezolusaun ne'e iha jornal repúblika iha website ministériu justisa: http://www.mj.gov.tl/jornal/public/docs/2021/serie_1/SERIE_I_NO_12.pdf

bázika, deputadu sira husu ba Governu atu tau konsiderasaun ba emprefáriu lokál sira, liuliu emprefáriu lokál iha Lospalos no Baukau ne'ebé prodús ona mina nuu, husu atu Governu bele sosa mós sira nia produktu.

Hatán ba preokupasaun husi deputadu sira, Ministru Asuntos Parlamentár no Komunikaun Sosiál hateten sei hato'o ba Ministériu relevante nune'e sei resposta iha tempu sira tuir mai.

Iha sesaun plenária ne'e mós liuhusi agenda *ordem do dia*, Parlamentu Nasionál aprova Proposta Lei Nú.10/V(2ª)- autorizassaun lejislativa ba Governu atu halo alterasaun ba Kódigu Prosesu Sivíl.

Diskusaun iha faze jeneralidade, deputadu sira aprova ho votus a favor 40, kontra 0 no abstenasaun 9. Iha espezialidade, aprovasaun ba lei ne'e hetan votus a favor 41, kontra 0 no abstenasaun 13. Nune'e Parlamentu Nasionál fó autorizasaun ba Governu atu halo alterasaun ba Kódigu Prosesu Sivíl.

4) 09 Feveiru 2021

Iha 09 Feveiru 2021, Parlamentu Nasionál halo reuniaun plenária ho agenda mak apresiasaun ba relatóriu fiskalizaun Komisaun F nian ne'ebé mak halo iha Munisípiu Baukau no Aileu.

Iha Baukau, Komisaun F deskobre katak iha sekretária autoridade munisípiu nian, iha forsa traballu hamutuk ema na'in 457 ne'ebé kompostu husi funsionáriu permanente 317 no kontratadu 140. Enkuantu ezekusaun OGE 2020 to'o Outubro 2020 atinji ona 76.05%, bens e serbisu atinje ona 72,25% no transferénsia pública atinje ona 65,70%.

Fasilidade saúde iha Munisípiu Baukau estabesele ona ospital rejionál 1, postu saúde 28, sentru saúde 9. Sentru Saúde Vemase seidak iha maternidade, maibé provizoriamente uza estabesimentu postu antigu hodi atende inan sira ne'ebé atu partus. Ekipamentu sira ne'ebé menus iha ospital refere mak hanesan ekipamentu kardiaku, inkubator no laboratóriu.

Problema transporte operasionál, bee-moos no saneamentu nafatin sai preokupasaun komidade sira nian.

Vizita fiskalizaun iha Munisípiu Aileu

Bazeia ba vizita fiskalizaun iha Aileu, Komisaun deskobre katak Postu Saúde Selo Kraik seidak iha espasu suficiente hodi halo atendimentu saúde ba iha komidade, menus pesoál saúde, laiha ekipamentu médiku no rezidénsia ba pesoál saúde.

Durante implementasaun orsamentu DOT laiha apoiu sosiál ba comunidade sira ne'ebé afetadu husi dezastre naturál, ba ema vulnerável sira, no mós apoiu sosiál sira seluk. Menus pesoál iha sentru solidaridade sosiál hodi hala'o serbisu administrasaun no atendimentu ba comunidade.

Nune'e, Komisaun rekomenda ba Governu atu tau atensaun no aumenta número profesionál saúde iha facilidade saúde husi postu saúde iha Munisípiu Aileu no Baukau. Presiza fó atensaun ba pesoál ne'ebé halo serbisu voluntáriu iha facilidade saúde sira. Asegura manutensaun regulár ba transporte ambulánsia no motorizada sira inklui opoiu kombustivel.

Iha intervensaun, deputada sira preokupa liu kona-ba funsionáriu públiku sira ne'ebé seidauk simu saláriu. Kestaun seluk mak husu ba Administrador Dili atu tau atensaun ba lixu sira iha Dili, tanba lixu sira iha Dili laran ne'e bele estraga imajen sidade nian.

Alende ne'e, deputadu sira mós foti kestaun kona-ba moras dengue hodi husu ba Ministra Saúde atu labele foku liu ba iha moras Covid-19 maibé presiza tau atensaun mós ba moras sira seluk tanba moras dengue agora aumenta maka'as no hamate ema. Tanba ne'e husu ba Ministériu Saúde presiza iha planu ne'ebé di'ak hodi halo prevensaun ba moras dengue, husu atu kontinua rega desinfektan ba fatin sira ne'ebé iha risku ba moras dengue.

Iha sesaun plenária *ordem do dia* Parlamentu Nasionál halo diskusaun no votasaun ba Proposta Lei Nú.15/V(2ª)- autorizasaun lejislativa kona Baze Jerál Administrasaun Públika ho votu afavor 33, kontra 10 no abstensaun 8.

5) 15 Feveiru 2021

Iha 15 Feveiru 2021, Parlamentu Nasional halo reuniaun plenária no liuhusi sesaun solene presta omenajen ikus ba saudozu ex deputadu Agosto Mausiri.

Saudozu Julião Mausiri "Meta Zebra" hanesan deputadu iha Assembleia Konstituinte primeira lejislatura 2002-2007, husi bankada PD, matebian moris iha Camea, postu administrativu Cristo-Rei, Munisípiu Dili, iha loron 17 Juñu 1966 no hakotu iis ho idade tinan 54. Omenajen ikus ne'e aprova ho votu afavor 53, abstensaun 0 no kontra 0.

Iha omenajen ne'e, bankada sira hato'o sira nia sentidu kondolénsia ba família matebian nian no hodi rekoñese saudozu nia kontribuisaun durante rezisténsia no depoisde independénsia no mós kontribuisaun ba desenvolvimentu rai doben Timor-Leste.

Ajenda *ordem do dia* kona-ba Proposta Lei Nú.25/V(3ª)-rejime júridiku Asosiasaun Públika Profisionál no Proposta Lei Nú.26/V (3ª)-kona-ba Orden Advogadu Timor-Leste la konsege realiza hodi suspende fali ba loron Tersa 16 Feveiru 2021.

6) 16 Feveiru 2021

Iha 16 Feveiru 2021, Parlamentu Nasionál halo reuniaun plenária no realiza de'it *ajenda ordem do dia* número 2 kona-ba pergunta ba Governu tuir Rejimentu Parlamentu Nasionál nian.

Durante sesaun pergunta ba Governu, deputadu sira hato'o preokupasaun no pergunta barak liu kona implementasaun programa sesta bázika, planu vasinasaun ba munisípiu sira ne'ebé besik fronteira, prosesu aprendizajen iha eskola sira iha área fronteira, jestaun lixu, prosesu manutensaun ba estrada sira no fatin estasionamentu iha kapital Dili.

Ajenda *ordem do dia* kona-ba Proposta Lei Nú.25/V(3ª)-rejime júridiku Asosiasaun Públika Profisionál no Proposta Lei Nú.26/V (3ª)-kona-ba Orden Advogadu Timor-Leste la konsege ho razaun sei decide fali iha reuniaun entre lider bankada sira.

7) 22 Feveiru 2021

Iha 22 Feveiru 2021, Parlamentu Nasionál halo reuniaun plenária ho *ajenda periodo antes ordem* nian mak halo apresiasaun ba relatóriu fiskalizaun Komisaun G no F nian ne'ebé mak halo iha Munisípiu Ermera no Likisá, inklui relatóriu GMPTL kona-ba atividade kampaña hapara violénsia hasoru feto no labarik.

Objetivu husi vizita fiskalizaun ne'e atu haree direita serbisu sira ne'ebé relasiona ho Komisaun G nia kna'ar iha ámbitu implementasaun estadu emerjénsia, haree rekursu umanu ba apoiu prosesu aprendizajen, facilidade eskola, kondisaun infraestrutur, kondisaun eskola nian, Orsamentu Estadu 2019 ne'ebé aloka ba Ministériu Edukasaun inklui orsamentu ne'ebé aloka ba serbisu edukasaun Munisípiu Ermera nian ba tinan 2019.

Problema sira ne'ebé Komisaun G deskobre iha vizita fiskalizaun refere mak hanesan:

Política descentralizasaun ne'ebé Governu estabelese hodi dezentraliza serbisu ministériu nian ba iha Munisípiu Ermera seidak loos, tanba iha ona delegasaun kompeténsia maibé orsamentu balun sei kontinua sentraliza hela iha nasionál, nune'e sai difikuldade ba munisípiu hodi halo ezekusaun serbisu hodi alkansa objetivu husi descentralizasaun ho di'ak liuliu responde política descentralizasaun ba iha comunidade.

Enkuantu kona-ba jestaun ba kondisaun eskola sira durante tempu impase política iha rai laran no pandemia Covid-19, serbisu edukasaun Munisípiu Ermera la'o tuir natureza serbisu ne'ebé Ministériu Edukasaun hato'o hahú husi inisiu tinan 2020, maibé iha implementasaun iha impedimentu maka'as durante prosesu aprendijazen iha Munisípiu Ermera.

Problema seluk mak kona-ba menus profesór iha Munisípiu Ermera, profesór kontratadu sira ne'ebé to'o agora seidak hetan mudansa iha estatutu ba sai profesór permanente.

Iha apresentasaun GMPTL nian kona-ba kampaña loran 16 hapara violénsia hasoru fetu no labarik fetu, GMPTL realiza semináriu abertura ho tema “ *mai ita hamutuk hatete lae ba asédiu seksuál no violénsia seksuál*” ne'ebé maka'as ho subtema “*favór hapara violénsia hasoru ami fetu no labarik fetu! Timor-Leste tenke sai fatin seguru!*”

Objetivu husi semináriu ida-ne'e atu kontinua realiza kompromísu GMPTL ba Lei Nú.7/2010-kona-ba Lei kontra Violénsia Doméstika hodi hapara violénsia hasoru fetu no labarik fetu, alende ne'e atu realiza mós kompromísu internasionál ratifikasaun CEDAW iha Timor-Leste.

Semináriu kampaña ne'e halo iha Munisípiu rua mak hanesan Munisípiu Ermera no Manatutu. Iha estatística kazu violénsia TL hatudu katak desde tinan 2012 to'o loran 25 Novembru 2020 rejista kazu hamutuk 1123. Iha tinan 2019 Munisípiu Manatutu rejista violénsia doméstika hamutuk 32, violénsia seksuál ho asédiu seksuál hamutuk 10. Husi número violénsia hirak ne'ebé rejistu kauza husi violénsia mak husi uza média sosiál.

Ajenda *periodo ordem do dia*, Parlamentu Nasionál aprova ona iha votasaun finál globál ba Proposta Lei Nú.11/V (2ª)-kona-ba Rejime Jurídiku Arbitrajen Voluntária no primeira alterasaun ba Kódigu Prosesu Sivíl.

Diskusaun ba proposta lei ne'e, iha proposta ida mai husi deputadu Francisco Vasconcelhos kona-ba Artigu 56 husu atu mantein ho proposta husi Governu nian ne'ebé iha prosesu arbitrajen presiza tempu fulan 12 tanba kazu sivíl barak mak pendente iha Tribunál ho nia kompleksidade ne'ebé presiza tempu atu rezolve, nune'e labele hatún prosesu arbitrajen ne'e ba fali fulan 6.

Aprovasaun ba proposta únika ne'e hetan votu afavor 29, kontra 9, abstensaun 9 no votasaun finál globál hetan votus afavor 36 kontra 6 no abstensaun 5 nune'e Lei kona-ba Rejime Juridiku Arbitrajen Voluntária aprovadu.

8) 23 Feveiru 2021

Iha 23 Feveiru 2021, Parlamentu Nasionál halo reuniaun plenária hodi halo apresiasaun ba Konta Jerál Estadu 2019 nian.

Iha diskusaun, bankada CNRT halo deklarasaun polítika hodi fó apresiasaun ba relatóriu fiskalizaun Kámara Kontas nian no husu ba Governu no instituisaun públiku sira atu konsidera rekomendasaun sira ne'ebé Tribunál Kontas apresenta.

Iha apresentasaun, Ministru Finansas hateten katak Konta Jerál Estadu tuir ona rekomendasaun sira ne'ebé ejize husi Kámara Kontas ne'e ho objetivu atu informasaun ne'e transparente liu no hein katak iha 2021, Governu bele avansa ona reforma nesesária atu mellora ezekeusaun orsamentál bainhira lei foun ba Orsamentu Jeral Estadu (OJE) hetan ona aprovasaun iha Parlamentu Nasionál atu substitui Lei Orsamentu no Jestaun Finanseira atuál.

Iha apresiasaun ba relatóriu Konta Jerál Estadu 2019 nian deputadu sira aprova ho votu sira a favor 36, kontra 0 no abstain 12.

Informasaun kompleitu kona-ba aprova Konta jerál Estadu 2019 bele asesu rezolusaun PN iha jornal da república³.

B. Reuniaun Komisaun A

Komisaun A, Parlamentu Nasionál iha fulan Feveiru 2021, konsege realize reuniaun hodi diskute no aprova lei sira iha especialidade no audénsia públiku ho entidade relevante sira hamutuk dala 10.

Rezultadu reuniaun hirak ne'e mak hanesan tuir mai ne'e:

1) Reuniaun 3 to'o 6 Feveiru 2021

Iha 3 to'o 6 Feveiru 2021, Komisaun A halo diskusaun iha especialidade ba Proposta Lei Nú.11/V(2)-aprova Rejime Jurídiku Arbitrajen Voluntaria no prosede primeira alterasaun ba Kódigu Prosesu Sivil iha Munisípiu Aileu.

Iha diskusaun especialidade ba kada artigu, Komisaun A halo aprovasaun to'o artigu 51 husi total artigu 73. Artigu hirak ne'e barak liu ko'alia kona ba regra no kondisaun hodi harii Tribunál arbitrajen. Entretantu artigu sira tuir mai husi proposta de lei ne'e ko'alia kona ba prosesu sira foti desizaun nia.

³ Website ministériu justisa: http://www.mj.gov.tl/jornal/public/docs/2021/serie_1/SERIE_I_NO_10.pdf

2) Reuniaun 10 to'o 12 Fevereiru 2021

Iha 10 to'o 12 Fevereiru 2021, Komisaun A kontinua halo diskusaun no finaliza diskusaun kona-ba substánsia husi artigu sira iha espesialidade ba Proposta Lei Nú.11/V(2)-aprova Rejime Jurídiku ba Arbitrajen Voluntária no prosede primeira alterasaun ba Kódigo Prosesu Sivíl iha Munisípiu Aileu.

Diskusaun refere lidera husi Prezidente Komisaun A, Deputadu Joaquim dos Santos no hetan partisipasaun husi membru Komisaun, Vise-Ministru Justisa, Ministru Asuntus Parlamentár no Komunikaun inklui advogadu no asesór sira.

3) Reuniaun 18 Fevereiru 2021

Komisaun A, Parlamentu Nasionál iha 18 Fevereiru 2021, hala'o reuniaun hodi halo aprovasaun ba relatóriu paraser husi komisaun nian sobre rajultadu aprovasaun iha espesialidade ba esbosu ba Proposta Lei Nú.11/V(2)-aprova Rejime Jurídiku ba Arbitrajen Voluntária no prosede primeira alterasaun ba Kódigo Prosesu Sivíl iha Munisípiu Aileu.

Rezultadu votasaun aprova ho unanimidade husi deputadu na'in 9 ne'ebé marka prezensa iha reuniaun Komisaun A nian.

4) Reuniaun 24 Fevereiru 2021

Iha 24 Fevereiru 2021 Komisaun A halo audénsia ho ONG Rede ba Rai hamutuk ho porta vos comunidade Kaicoli ne'ebé sai afetadu ba projetu konstrusaun edifísiu Kuartel Jerál PNTL nian.

Organizasaun Rede ba Rai liuhusi nia porta voz, Pedrito Viera apresenta katak Rede ba Rai hanesan organizasaun rede ne'ebé halo akompañamentu ba família afetadu 11 husi alargamentu Kuartel Jerál PNTL Caikoli.

Objetivu husi audénsia ne'e atu rona direita preokupasaun sira ne'ebé durante ne'e comunidade afetadu sira enfrenta.

Rede ba rai haktuir katak se projetu alargamentu ida-ne'e implementa duni sei iha poténsia boot hodi hamosu violasaun ba diretu umanu comunidade sira nian liuliu iha tempu defisil dadauk ne'e ita enfrenta hela ho pandemia Covid-19.

Planu governu nian ba konstrusaun edifísiu ne'e hahu kedas iha 2014 no tuir akordu ne'ebé asina ona husi Eis Ministru Defeza e Seguransa, Jose Somotxo katak

kompañia ne'e sei kaer husi kompañia *Shanghai Constraction* ho montante osan US\$10,177,638,20.

Desde tinan 2013 to'o agora, prosesu negosiasaun entre Rede ba Rai no família afetadu sira ho DNTP halo dalabarak ona maibé seidak iha rezultadu ida ne'ebé serteza. Durante prosesu negosiasaun Rede ba Rai kolabora di'ak tebes ho parte DNTP no sempre hato'o preokupasaun sira kona-ba comunidade sira nia direitu loloos maibé parte DNTP la fó resposta ne'ebé serteza.

Iha 22 Outubru 2020, comunidade sira simu karta notifikasaun ne'ebé mak hasai husi DNTP katak iha notifikasaun ne'e ho karáter obrigatóriu no laiha ninia fundamentasaun nu'udar formalismu legál sira iha Lei Nú.8/2017 kona-ba Lei Espropriasaun tanba utilidade pública ejize tenke halo tuir.

Komunidade sira mós hato'o katak Komandu PNTL orienta ba comunidade sira atu simu konta bankária ne'ebé prepara ona maibé comunidade sira la simu tanba seidak iha konkordánsia ba valór indemnizasaun ne'ebé atu hetan. Situasaun ne'e halo comunidade sira sente la hakmatek, kalan toba la dukur no hanoin barak tanba hela fatin laiha. Komunidade afetadu sira mós apresenta katak sira prontu atu kolabora maibé importante mak Governu tenke kria kondisaun ne'ebé dignu ba sira.

Hatan ba preokupasaun hirak ne'e membru Komisaun A, deputadu Patrocino Fernandes hateten asuntu ida-ne'e importante atu rona husi Governu. Maski povu tenke hakruk ba Estadu maibé ita gasta osan ba halo lei ne'e mós tenke trata ita nia povu sira ho dignu. Husi parte Prezidente Komisaun A hateten katak bainhira Governu atu halo desenvolvimentu ruma, desizaun ne'ebé foti tenke tuir lei. Tanba iha K-RDTL Artigu 54 prevee katak atu hasai ema ruma nia propriedade privadu hodi uza ba públiku tenke selu indemnizasaun ne'ebé loos ba sidadun afetadu.

Husi audénsia ne'e, Komisaun A promote sei hasoru malu ho Governu hodi haree ba preokupasaun hirak ne'e. Se karik la iha solusaun, seluk mak tenke lori ba iha Tribunál.

4). Reuniaun 25 Feveiru 2021

Iha 25 Feveiru 2021, komisaun A hala'o Audiénsia ho Diretór Polísia Sientífiku Inverstigasaun Kriminál (PCIC-sigla Portugues), relativa kona-ba Kriasaun Lei Organizasaun Investigasaun Kriminál.

Iha diskusaun ne'e, Diretór aprezetan kona-ba progresu serbisu sira ne'ebé PCIC halo no dezafiu sira inklui preokupasaun públiku no deputadu sira nia kona-ba serbisu

sobrepoin ne'ebé entre polísia nasionál ho PCIC halo no la orientadu hodi persiza hadia.

Relasiona ho kazu investigasaun sira direktór ne'e haktuir katak nia parte haree katak lei regula klaru no PCIC halo nia serbisu tuir koridor lei nian, maibé públiku sente intervensaun ne'e fora husi kompeténsia PCIC nian sira konkorda atu klaru liutan tenke regula iha lei espesífiku hanesan Lei investigasaun Kriminál.

Deputadu sira mós hato'o sira nia preokupsaun kona-ba serbisu sobrepoin ida ne'e, ne'ebé mós sai preokupsaun públiku tanba ne'e iha sira nia intervensaun sira konkorda atu iha tempu badak sei prepara Estatutu kona-ba Lei investigasaun kriminal nian.

Konkluzaan no rekomendasaun

Iha fulan Fevereiru 2021 maski iha hela situasaun pandemia Covid-19, maibé atividade Parlamentu Nasionál nafatin funsiona normál. Atividade sira ne'e tantu iha reuniaun plenária no reuniaun Komisaun Espesializada Permanente sira inklui audénsia públiku Komisaun A nian ba proposta no projetu lei sira. Parlamentu Nasionál kontinua hatudu efisiénsia no efetividade ne'ebé aas, maski deputadu sira sei iha diverjénsia política. Parlamentu Nasionál mós konsege halo diskusaun no aprovasaun ba lei importante sira balun.

JSMP nota mós katak komisaun espesializada sira nia relatóriu viziata fiskalizaun apresenta tarde no husi relatóriu hirak ne'ebé apresenta iha fulan Fevereiru maioria atividade vizita tinan 2021 ne'ebé la nesésariu ona atu diskute tanba la relevante.

Nune'e JSMP rekomenda ba meza Parlamentu Nasionál atu hadia mekanizmu apresentasaun relatóriu vizita fiskalizaun tuir tempu maizumenus tarde fulan 1 no husu mós ba deputadu Parlamentu atu kontinua serbisu hamutuk hodi foti desizaun ruma ne'ebé mak prioridade ba interese Estadu inklui desizaun sira ne'ebé liga ho inimigu invizivel Covid-19 ne'ebé oras ne'e sai ameasa boot ba nasaun iha setór hothotu, liuliu setór saúde.